

---

## Риштон тумани ҳоқими Суфҳонжон Солиевнинг МУРОЖААТИ

### **Ҳурматли Риштонликлар, туманимиз меҳмонлари!**

Барчамизга маълумки, бутун дунё бўйлаб коронавирус касаллиги кундан кун янада авж олмоқда. Жумладан, юртимизда ҳам сўнгги кунларда касалликка чалинганлар сони ортиб бормоқда. Бугунги синовли кунларда халқимиз бир тану бир жон бўлиб, дунё халқлари бошига келган ушбу касалликка сабр-матонат, ҳамжиҳатлик билан курашмоқда.

Ўзбекистон Республикаси Президентининг 2021 йил 13 июлдаги ПҚ-5182-сонли қарорига кўра, Қурбон ҳайитини карантин талабларига риоя қилинган ҳолда, халқимизнинг миллий ва диний анъаналарига мос равишда ўтказиш борасида вазифалар белгиланди.

Қолаверса, карантин шароитини инобатга олиб, одамлар жамланишига сабаб бўладиган урф-одатларни ташкил этмаслик, уйма-уй юриб, турли азахонликлар, маърака-маросимларни ўтказмасликни тавсия этамиз.

Ўзбекистон мусулмонлар идораси Уламолар кенгашининг Фатвосига асосан “Қурбон ҳайити намозида катта жамоат бир жойда жамланишини инобатга олиб, пандемия янада авж олмаслиги, вабо оқибатларини юмшатиш мақсадида шу куни ийд намози адо этилмайди, ўрнига уйда Зуҳо намозини ўқиш тавсия этилади.” деб белгиланди.

Шунингдек, ёши улуғ кексалар ва беморлар ҳолидан хабар олиш ҳамда ҳайит билан табриклаш ва бошқа миллий урф-одатлар билан боғлиқ анъаналарни алоқа воситалари орқали амалга ошириб туриш тавсия этилади.

Азиз ҳамюртлар!

Барчангизни белгиланган карантин қоидаларига қатъий амал қилишингизни, ўзингиз ва яқинларингизни эҳтиёт қилишингизни сўраб қоламиз.

2021-07-19 15:20:33